

## Definitivamente dump no ta bin na Wela

# ARUBA LO HAYA UN DUMP MODERNO NA PARKIETENBOS

*No tin kimamento di sushi mas, pero un parke Nacional na dump*

ORANJESTAD (AAN) Esfuerzonan grandi cu parlamentario Rudy Croes di M.E.P. a haci pa no permiti gobierno traha un dump na Wela, a duna resultado positivo pasobra, segun informacionnan suministra na DIARIO. Parce cu gobierno a deshaci di e plan pa construi un dump na Wela, pariba di Sabana Basora, pero a mantene e plan pa construi e dump cu ta uno super moderno na Parkietenbos.



Den luna di November aña pasa, DIARIO a trece e noticia cu Gobierno tin plan pa traha un dump na Wela. Habitantenan di Wela, Sabana Basora, y Pos Chiquito a protesta. Den e protestanan aki tabata tin parlamentario Rudy Croes, kende a para ariba cu ningun momento e ta permiti pa traha un dump na Wela of vecindario. Parlamentario Croes tabata na altura cu ta trata di un dump moderno, pero e no kier a tuma aden pa construi e dump na Wela.

Fuenteran cu ta bon na altura a duna DIARIO di conoce cu gobierno a dicidi di construi e dump moderno aki na Parkietenbos, unda e dump actual ta. Plannan ta hopi avanza caba y pronto gobierno lo cuminsa traha riba e proyecto aki.

E dump ta uno super moderno, sushinan no ta worde kima mas, holor desagradable ta ser kita por completo, no tin mas polucion y e bario lo keda den un ambiente fresco y

diferente.

E dump lo ser cambia por completo pa un parke nacional cu practicamente bo no por imagina cu tin un dump eyan. Lo construi plantanan y mashinnan especial cu lo mula e sushinan chiquito.

Mucho detaye DIARIO no por a haya di e planta moderno aki cu lo bay alivia e bario di Simeon Antonio y vecindario. Na varios ocasion DIARIO a trata di drenta den contacto cu Ministro Kelly di D.O.W. pero no tabata posible pasobra Ministro Kelly ta den reunion y su secretaria a keda di dune contesta pa yama DIARIO.

DIARIO a logra haya parlamentario Rudy Croes kende a duna su comentario riba e dump super moderno cu lo ser traha na Parkietenbos. Parlamentario Rudy Croes a bisa cu e ta sumamente contento cu e dump no a ser traha na Wela y mas ainda cu por fin e habitantenan di Simeon Antonio y vecindario lo haya e alivio di humo y holor desagradable cu ta sali for di e dump. Pa basta aña caba habitantenan ta sclama pa cambio y por fin e cambio a yega. Si gobierno a traha e planta moderno aki na Wela, sigur e habitantenan di Parkietenbos, Simeon Antonio y vecindario lo a keda cu e mesun problema cu e holor desagradable di e dump di Parkietenbos cu pa tanto tempo nan ta pidi alivio pe. Pesey mes parlamentario Rudy Croes a forza pa e dump moderno no ser traha na Wela sino na Parkietenbos, pa asina alivia e habitantenan di e bario.

Parlamentario Rudy Croes ta hopi contento cu e dump nobo cu ta un sistema hopi moderno di landfill.



Entrante 25 di Maart, Algemene Bank Nederland N.V. ta expone pa un luna consecutivo pinturanan di e artistanan local Alida Martinez y Lydia Antonis. E cuadranan ta creacionnan al oleo, estilo realistico y sub realistico abstracto. Durante di un ceremonia cortico Menelio Leofstok, sub gerente di Algemene Bank a efectua apertura di e exposicion den e hal di e banco. Un y tur ta keda invita pa presencia e precioso obranan den e oficina principal di Algemene Bank situa den Caya Betico Croes.